

Don Ruben Yrausquin a fayece

E ta entre otro fundador di e compania R.E. Yrausquin & Sons na Korsou



ORANJESTAD- *E tabata entre otro fundador di loke nos conoce awe como R.E Yrausquin & Sons, agencia di autonon marca Ford y Mitsubishi na Aruba. Diamars ultimo Sr. Ruben Efrain Yrausquin, naci na Aruba dia 22 di November 1916 a fayece na Aruba na edad di 91 aña, despues di un lucha largo cu su salud. Nos ta referi aki na e tata di Rubencito Yrausquin q.e.p.d. y abuelo di e rumannan Yrausquin cu awendia ta manehando R.E Yrausquin & Sons.*

Un aña prome cu e Prome Guerra Mundial, Ruben a nace na Aruba den e cas unda cu añanan despues Club Tivoli a establece su mes. Den e temponan difícil di guera, su mayornan tabata dividi nan bida entre Aruba y Puerto Cumarebo na estado Falcón, Venezuela.

Ta pa e motibo aki e mucha homber chikito aki a pasa su prome añanan den e poblacion Venezolano unda cu el a asisti scol hunto cu su rumannan Fernando y Alexis. Ruben Yrausquin tabatin solamente 5 aña ora cu su ruman Harold

a nace y su tata Efraín a muri tragicamente.

Don Ruben Yrausquin, manera nan tabata yame a cuminsa su bida di comerciante na edad hopi hoben. Na edad di 7 aña el a cuminsa bende bals, limpia zapato y despues cuminsa bende zapato den aki na Aruba.

E tempo ey hacimento di negoshi no tabata facil y mester a pasa trabao pa bende Bo productonan. Circumstancianansin embargo a pone cu na un dado momento e famia mester a muda y a bay biba na Korsou, na Otrabanda.

Y aki Ruben a drenta e mundo comercial na Korsou trahando como bendedor den e negoshi di su primo Augusto Damian Jonckheer, cu tabata ubica den e “begane grond” di Hotel Americano.

E no a conforma su mes cu su ingresonan ora cu el a haña sa cu tabata tin un inventario grandi di Keds cu no tabata bendiendo bon y Ruben a sigura su primo cu e si lo por bende nan. Ruben a huur un pick-up y cu esaki e a core

henter e caminda cu ta yega West Punt te ora cu el a bende henter e inventario, sea ta na cash of na credito. E prueba di aspiracion, abilidad y perseverancia tabata suficiente pa su primo Augusto yude pa habri e tienda Vogue.

E actividadnan comercial di Ruben no tabata limita na Cursow so. Den e decada di añanan 40, un gran amigo di famia yama Don Elías Mansur tabatin un tienda grandi yama

Mansur Trading; Don Elias a ripara e abilidadnan superior di Ruben y e relacion aki a sirbi como un gran experiencia pa e hoben y Don Elias a bira socio cune den un negoshi di paña na Corsow.

Mester menciona cu na aña 1952 ela cuminsa cu e negoshi di auto R.E Yrausquin & Sons na Korsou. Don Ruben a pasa den hopi tempo durante su añanan den negoshi, pasobra despues di a lanta diferente compania for di tera y , ata e fecha 30 di Mei 1969 a bati na porta. Apenas el a drenta den su edificio nobo na Saliña cu su agencia di auto, Botica Brion & Botica Americana, pacus di paña y hasta un negoshi conoci como “Discoteca Brion”. E susedidonan e tempo ey a causa cu tur su negoshinan a kima por completo, el a perde tur cos y mester a cuminsa completamente di nobo atrobe. E unico cos cu a reste e tempo ey tabata su experiencia y bon reputacion.

Awendia e tercer generacion di famia Yrausquin ta manehando e agencia di autonon Ford y Mitsubishi na Aruba. “Abuelo semper a keda pendiente di nos y tabata cla pa un consejo. Mi ta masha orguyoso di por a siña hopi di dje. E ta bini di e generacion cu no tabatin

tanto posibilidadnan manera nos tin awendia, y a demostra cu trabou duro y dedicacion ta paga. Nos lo sinti su falta hopi”, asina Juan David Yrausquin a bisa.

Ruben Efrain Yrausquin a haci hopi riba diferente tereno y como tal a ricibi un condecoracion di S.M La Reina. E tabata consul honorario di Spaña na Korsou y a ricibi tambe un condecoracion real di España. Su trabounan diplomatico no a keda limita solamente na Korsou, pasobra aki na Aruba el a sirbi tambe como Consul di Venezuela. E la ricibi dos condecoracion presidencial di Venezuela, esta e Orden Francisco de Miranda den su Primera y Segunda Clase. E ta e Presidente Honorario tambe di Sociedad Bolivariana na Korsou.

Su entiero lo tuma lugar na Korsou. Su deseo ta pa dere banda di su di dos señora cu a fayece na anja 1989. Aki na Aruba lo tin posibilidad pa duna condolencia awe diabierna 19 di September for di 7or pa 9or na Caya Frere Alexius 5.

E ceremonia di despedida lo tuma lugar diasabra atardi entre 2or pa 4or durante un santo sacrificio di misa na Misa San Francisco na Oranjestad.

